

SAMNINGUR UM RANNSÓKNASTOFU Í NÆRINGARFRÆÐI

Háskóli Íslands og Landspítali gera með sér svofelldan samning um Rannsóknastofu í næringarfræði, sem tekur við af samningi aðila um sama efni frá 16. júní 2011:

1. gr. Almennt

Rannsóknastofa í næringarfræði er vísindaleg rannsóknastofnun við Háskóla Íslands og Landspítala sem hefur samstarf við háskóla, deildir spítalans og aðrar stofnanir um rannsóknir á sviði næringarfræði. Stofnunin er vettvangur vísindarannsókna og þróunarstarfs á sviði næringarfræði. Rannsóknastofa í næringarfræði lýtur sérstakri stjórn og hefur sjálfstæðan fjárhag á grundvelli þessa samnings.

2. gr. Markmið

Markmið Rannsóknastofu í næringarfræði eru:

- að vera miðstöð rannsókna á sviði næringarfræði sem heilbrigðisvísindagreinar,
- að efla tengsl rannsókna og kennslu í næringarfræði við Háskóla Íslands og aðra háskóla,
- að efla rannsóknir og nýsköpun á sviði næringarfræði í samræmi við stefnu Landspítala og Háskóla Íslands,
- að styðja kennslu og þjálfun í vísindalegum vinnubrögðum og veita nemendum í framhaldsnámi og rannsóknatengdu námi leiðsögn, aðstöðu og búnað til rannsóknastarfa eftir því sem kostur er,
- að stuðla að samstarfi við innlenda og erlenda rannsóknanaðila á sviði næringarfræði og í öðrum vísindagreinum og sterkum tengslum við atvinnu og þjóðlíf,
- að hvetja til og taka virkan þátt í útgáfu klínískra leiðbeininga um næringu sjúklinga og leiðbeiningar um næringu annarra viðkvæmra hópa,
- að stuðla að útgáfu rita um rannsóknaniðurstöður, á hágæða alþjóðlegum ritrýndum vettvangi og hérlandis, og að annarri þekkingarmiðlun á sviði næringarfræði
- að veita upplýsingar og ráðgjöf varðandi næringarfræði.

3. gr. Stjórn

Stjórn skal skipuð fjórum fulltrúum til þriggja ára í senn. Skulu tveir skipaðir af háskólarektor og tveir af forstjóra Landspítala. Varamenn skulu skipaðir með sama hætti. Stjórnarmenn skipta með sér verkum.

Hlutverk stjórnarinnar er m.a. að vera til stuðnings við að marka stefnu stofnunarinnar.

4. gr. Fjármál

Tekjur Rannsóknastofu í næringarfræði eru

- a. framlag frá ríkissjóði eins og kveðið kann að vera á um í fjárlögum,
- b. styrkir til einstakra rannsóknarverkefna,
- c. greiðslur fyrir þjónustustarfsemi,
- d. tekjur af útgáfustarfsemi,
- e. aðrar tekjur, t.d. gjafir.

Viðbótarkostnaður sem til fellur vegna einstakra verkefna skal borinn af viðkomandi verkefni. Rannsóknirnar munu koma fram í yfirliti yfir starfsemi rannsóknastofunnar en hver rannsókn er sjálfstæð og er á ábyrgð viðkomandi rannsakenda.

5. gr. Aðstaða

Heimili Rannsóknastofu í næringarfræði er á Landspítala og aðstaða fyrir starfsemina er sett upp í samvinnu við spítalann. Önnur aðstaða er samkvæmt samningum um einstök verkefni. Framtíðaráform um aðstöðu verða í samræmi við áætlun Háskóla Íslands og Landspítala.

6. gr. Starfslið og forstöðumaður

Starfslið stofunnar eru

- a. starfsmenn HÍ og LSH sem fengið hafa starfsaðstöðu á stofunni samkvæmt samningi við háskóladeildir eða aðrir sem fengið hafa starfsaðstöðu samkvæmt samningi,
- b. starfsfólk sem þörf kann að vera á að ráða til að styðja við starfsemi rannsóknastofunnar,
- c. gistikennrarar, sérfræðingar, stundakennrarar og nemar í rannsóknatengdu námi, sem sinna tímabundnum verkefnum í næringarfræði eða skyldum greinum, samkvæmt ákvörðun forstöðumanns,
- d. stúdentar sem vinna að verkefnum á stofunni í tengslum við nám.

Við það er miðað, að forstöðumaður stofunnar komi úr hópi starfsliðs hennar.


Forstöðumaður annast daglegan rekstur stofunnar. Stjórn getur lagt til við forstjóra Landspítala og háskólarektori að til stofunnar sé sérstaklega ráðinn forstöðumaður.

7. gr. Gildistaka og breytingar

Samningur þessi, sem er gerður í tveimur samhljóða eintökum, öðlast gildi við undirritun. Samningurinn er í upphafi gerður til fimm ára en samningsaðilar munu fyrir mitt ár 2021 taka afstöðu til þess hvernig samstarfi um stofuna verður fram haldið. Ef breytingar verða gerðar á samstarfssamningi HÍ og LSH á gildistíma þessa samnings skal honum breytt ef nauðsynlegt þykir.

Reykjavík, 26. september 2017

F. h. Háskóla Íslands



Jón Atli Benediktsson rektor

F.h. Landspítala



Páll Matthíasson forstjóri